



PRVI KONGRES
OSOBA SA INVALIDITETOM
U BOSNI I HERCEGOVINI

JAKI ZAJEDNO

UVEZIVANJE I JAČANJE
ZAJEDNIČKE PLATFORME

8.-10. NOVEMBAR 2023.
HOTEL HOLLYWOOD, ILIDŽA
SARAJEVO

Rješavanje ključnih pitanja – JAKI ZAJEDNO

Počeo Prvi Kongres osoba s invaliditetom u Bosni i Hercegovini

Sarajevo, 09.11.2023.

Prvi Kongres osoba s invaliditetom u Bosni i Hercegovini okuplja organizacije, saveze, forume žena, koalicije i aktiviste kako bi razgovarali i rješavali važna pitanja koja utiču na živote osoba s invaliditetom.

Ovaj jedinstveni Kongres je započeo s plenarnom sjednicom u srijedu, 08.11.2023., a nastavlja se s veoma intenzivnim programom, kroz sesije i panele s različitim temama koje okupljaju interesatne učesnike i sagovornike.

„Ovo je prvi kongres koji je na jednom mjestu okupio preko 160 učesnika, predstavnika velikog broja organizacija, te je njegov značaj istorijski. Mnogo je važnih tema na ovome Kongresu, jedna od njih je zapošljavanje, koje je od posebnog značaja za samostalnost i nezavisnost osoba s invaliditetom“, rekao je **Branko Suzić**, predsjednik skupštine **Unije organizacija osoba s invaliditetom** te dodao da se nada da će Unija postati nosilac aktivnosti u razgovorima između osoba s invaliditetom i vlasti.

Da se dugo čekalo na jedan ovako važan Kongres, potvrđuje i **Almir Šahmanija**, predsjednik Vijeća organizacija osoba s invaliditetom FBiH i predsjednik Saveza distrofičara FBiH koji je članica Unije: „Osobe s invaliditetom se svakodnevno susreću s preprekama, od samog kretanja, pa do onih sistemskih, tokom obrazovanja, prilikom traženja posla, a da ne govorimo o samostalnom životu uz podršku koje gotovo ne postoji.“

Binasa Goralija, regionalna koordinatorica **MyRigtha za Evropu** je navela: „Posebno izraženu višestruku diskriminaciju doživljavaju žene, naročito one s intelektualnim invaliditetom. Rodna pitanja se prepliću sa invaliditetom te društveni stereotipi i očekivanja o rodu dodatno otežavaju položaj osoba s invaliditetom, a posebno žena. To su teme o kojima malo ko govori, a o kojima ćemo razgovarati na Kongresu.“

Kongres će potaknuti stvaranje šire platforme za diskusiju s ciljem postizanja saglasnosti svih učesnika o pitanjima od značaja za osobe s invaliditetom, te afirmirati pristup invalidnosti koji se zasniva na modelu ljudskih prava.

Organizatori Kongresa su Unija organizacija osoba s invaliditetom u Bosni i Hercegovini, MyRight u Bosni i Hercegovini i Caritas Bosne i Hercegovine, a medijski pokrovitelj je BHRT.